

本朝分省人物考

人物考目錄卷之六十六

江西吉安府

四

蕭翼

鍾同

劉喬

彭華

尹直

劉鈺

伍驥

傅韶

張敷華

彭教

劉震

周孟中

羅璟

張達

康驥

楊琚

阮玘

朱儀望

蕭禎

羅倫

劉彬

彭禮

羅璞

伍符

劉丙

王禎

馬鉉

劉戩

周魯

彭杰

何孟春

趙璜

本朝分省人物考卷之六十六

江西吉安府

四

蕭翼

蕭翼永新人正統間由進士知潛山改知長垣黃河漂民舍十常八九翼浚河築堤身先衆役發粟賑貸踰二稔而水定民安任滿老稚遮畱不可爭祠祀之陞順德知府歸裝惟一琴而已

鍾同

鍾同字世京永豐人景泰二年進士三年冬爲監察御史同當易儲時每獨坐深思泣下已而懷獻太子

卒同入朝待漏與禮部郎中章綸論儲位事慷慨流涕五年九月因遂上疏請復立沂王東宮以固宗社并陳時政闕失疏入縛下詔獄械繫極苦杖之不死又下獄六年八月又杖闕下下獄竟死獄中時年三十二骸掩園土莫敢收葬裕陵復辟日鍾同忠誠節義可貫金石贈大理左寺丞官其二子知縣茂陵又憐其以忠受慘禍祿妻羅氏官其二子通政知事啓上疏請遺骸得出園土歸葬時歿久矣血漬髻間洗出倍鮮好成化二十三年啓援綸例請謚得謚恭愍

劉喬

劉喬字述憲萬安人景泰癸酉用廕爲國子生遂舉  
京闈鄉貢第二人成化丙戌登進士第知湖之歸安  
歸安壯縣喬應手剗析獄無滯囚苗死澇而鄰邑旱  
不可植乃教民市其苗植之穫再倍每東作躬歷田  
野徒步入里舍問民疾苦默詢其家豐嗇人賢不肖  
賦稅獄訟率視此爲據吏不得售其姦禮禁喪俗士  
家以佛齋致饋却弗內富民送葬妓樂數十舸則罰  
以示戒癸巳召爲河南道監察御史按廣西荔浦徭  
叛檄藩司守臣平之柳慶田三府多警凡所指盡動

中機會還按京畿稽諸司卷籍無所縱壬寅擢福建  
按察副使發匿摘伏屬吏畏服有大俠私畚射利盤  
結下上莫能制亟斷遣之弘治戊申以外艱歸服闋  
擢湖廣按察使持法甚謹庚戌用刑部尚書彭惠安  
薦遷右布政使辛亥轉左布政使壹尚寬簡盡除苛  
厲人或訝之曰牧道固是也會修三王府極力綜治  
民不告怨勘諸府獄事皆得理蓋自筮仕至是勤勩  
舉職未嘗少逸間代祀南獄力疾以往還至蘄州卒

### 彭華

彭華字彥實安福縣人生負異質年十九領鄉薦景

泰甲戌會試第一登進士第選爲翰林院庶吉士七年修寰宇通志成授編修天順元年奉使靖江王府還戊寅與修大明一統志以多支廩餼坐除名賴大學士李賢救免八年憲宗嗣位入侍經筵成化三年丁亥英廟實錄成纂修校正功遷侍讀四年戊子充講官五年己丑進侍講八年壬辰擢侍讀學士攝詹事府事賜金帶十三年修續資治通鑑剛目成選翰林院學士孝廟出講儲宮華首講大學尋掌院事十五年用內閣萬安薦超擢詹事仍兼學士十八年御製文華大訓成進講儲官加從二品



祿嘗主考兩京秋闈再典會試文衡兩充 廷試讀  
卷官藻鑑詳明得人最多方復考會試有貴家子在  
選硃墨卷不合華黜之矢志者欲中傷之竟不能爲  
害二十二年陞吏部左侍郎仍兼學士入閣預機務  
制誥冊命多出其手本年驟得風疾上疏辭不允進  
太子少保禮部尚書辭亦不允 賜麒麟服下未懇  
辭得 俞旨歸就醫藥輿疾出都城過 闕門匍匐  
稽顙泣下沾臆歸未至以上 太皇太后徽號恩  
誥贈祖考如其官贈祖母母妻俱爲夫人華才識超  
邁而深沉嚴重人莫窺其際實則坦亮可親平居不

妄語笑及論畫國是從容應酬有餘裕窮計極慮者殆未之及焉然阿附萬安與妖人李孜省相比以故肆讒投間亟亟若狂如尚書李秉王恕馬文升秦紘侍郎邢讓祭酒陳鑑與其同鄉劉宣羅璟相繼斥逐華之力居多未幾卒謚文思

尹直

尹直字正言別號審齋泰和縣人直在孕蕭夫人夢巨螭入室其將誕也族祖仲玉仲謙見其家紫氣騰上以爲失火旣聞直生相顧賀曰亢吾宗者必此子也兒時穎異過人稍長爲文奇逸儕輩皆出其下景

泰癸酉領江西鄉薦明年甲戌中禮部第二 廷試

賜進士出身改翰林庶吉士與修寰宇通志丙子五

月除編修天順改元奉 命祭南海戊寅與修 大

明一統志 憲宗御極充經筵講官與修 英廟實

錄初 景皇帝名號未定或欲從昌邑更始例直力

辯不可成化丁亥實錄成陞侍讀上言典章制度必

大備于文明之朝著述纂修當不廢于承平之世我

祖宗神功聖德雖登于秘史其儀文法制未載于全

書雖有諸司職掌然遺略尚多更草不一欲示永久

曷萃大成乃若通鑑剛目起自周威烈王迄于五季

茲宜續修以成巨典 上是其言是年與校貞觀政  
要已丑春祀四陵以秀王主祭陪祀官循舊分行直  
言往者兩大臣主祭故陪祀者可分王今徧詣四陵  
陪祭者尚可分耶禮官愕然從之壬辰陞侍講學士  
所講必傳時政辭意誠懇 上每爲感悟乙未陞禮  
部右侍郎南京地震廷臣疏請修省屬直具稿所陳  
多觸時忌同列頗難之直請獨任其責畚夷入貢愬  
往年有遺賞數以萬計咸謂夷情宜勉徇直言給賞  
據當時名籍豈有遺者若一墮小人欺冒之計將來  
何以繼之未幾來者果踵相躡衆益服其明決宣府

左衛請度僧行百餘人直曰是皆在邊戍卒豈可空什伍以充梵刹乎議通行諸邊禁止之丙申以父憂歸己亥服闋改南京吏部甲辰陞南京禮部左侍郎請汰出欽天監生徒之冗濫者值歲旱命大臣會法司讞獄過刻立異者徃徃猶欲覆勘直謂深求淹繫豈緣旱卹刑意耶由是多從輕宥益直所存平恕在兩京一再審錄閱情有可矜輒爲辯救得減死論者數人丙午召爲兵部左侍郎會貴州守臣奏叛苗勢甚猖獗宜合兵亟勦之直言此必貪功生事者冀有所指取苗勢未必然也力贊大司馬公請遣御史

往勘卒以撫定是年九月改戶部左侍郎兼翰林學士入內閣叅典機務尋加太子少保陞兵部尚書

賜麒麟衣一襲直以首相萬安爲知己遇事裨救爲多一時制語典冊亦多直手丁未皇貴妃萬氏薨

上諭欲歛以黃且用后塋直與同官力爭乃止

時占城王子古來爲安南所逼棄國至廣求援該部議令守臣送之還國直言遠夷爲強國所侵其來愬者恃我能爲之主也若徒遣之歸而一無所處是棄之矣宜令大臣至廣審度事宜且勅責安南敦睦隣好庶不失以大事小之體因薦都御史屠濬往由

是安南欽哉古來得領封還國邊情緩急直臨事以  
意籌之多中肯綮夏不雨直與同官疏致旱之由

上爲輟建寺工役省禁中齋醮放宮女三百餘人逾  
二日雨各 賜宮扇一上繪魏徵像書御製良臣賦  
蓋旌其言之善也尋以 皇太子冠爲宣祝使遂

賜玉帶八月 憲廟上賓遺詔中有欲加一二語者  
其所關甚重直取天順甲申舊章示之乃止 孝宗  
旣嗣大寶知直善萬安一日有 旨欲召用內監舊  
臣懷恩之在南都者直謂此非初政急務而其機已  
不可遏乃上章引避不允懷恩旣至直與萬安益不

可復留矣直歸老于澄江之上猶日以講學爲事二  
大夫過者必被容接未嘗厭倦晚年氣體益壯步履  
如飛少年或不能及蓋居林下者二十七年八十有  
五而卒謚文和直身長偉貌望而知其爲台鼎之器  
襟宇濶略議論英發文章豐蔚雄啗其氣充然與丘  
文莊公彭文思公舉進士爲同年以博雅更相推服  
嘗同考會試者二考兩京鄉試及會試者各一鑑別  
精確得人最多若謝文莊羅一峰程篁墩吳文定尤  
號稱魁傑之士平生著述甚富其傳者有澄江集名  
相贊南宋名臣言行錄皇朝名臣言行通鑑明良交



泰錄瑣綴錄或謂江右李孜省用事直密與通而實不然觀其斥中使李毅之誣辯御史吳珍之寃夫豈徇附者哉

劉 鈞

劉鈞字仗和忠愍球之子安福人自幼穎敏過人忠愍躬教之時姚文敏學于忠愍之門鈞與之上下議論文敏每歎服之稍長從學于禮部侍郎李克述學益大進會忠愍以諫受禍哀痛毀瘠幾不能生服闋讀書養母無復仕進意 景皇帝卽位臺諫言忠愍之寃詔贈官賜諡且祀于郡之忠節祠刑部侍郎楊

彥謐巡撫江西召鈺語之曰而翁忠節已獲昭雪子  
可以仕矣乃赴江右省試以春秋魁多士甲戌登進  
士第改翰林庶吉士預修寰宇通志書成擢廣東道  
監察御史未幾出巡福建畿郡遼東于時同官者務  
擊搏以峙聲威鈺惟慎憲度理冤獄察吏治巡歷所  
至訪民利病而興革之不求赫赫名人皆爲得憲體  
真定有婺婦不安其室其族長恥之合羣從毆殺之  
有司坐以謀殺論死者七人鈺曰此羞惡之心也何  
可深罪具以上請遂皆免死福建都指揮僉事錢輅  
與其長劉姓者有隙劉密白鎮守中官誣以罪乘夜

以兵圍其第輅覺而逃中官遽以輅反聞廷議遣官  
會鈇覈其事輅亦自首鈇具奏輅懼罪而逃非反也  
輅得釋每語人曰微劉御史吾族夷矣汀州豪民欲  
奪隣之墳地以葬其親鄰不與豪怒言于朝云其地  
當出帝王 英宗遣中貴人會鈇驗之曰八閩遐且  
僻寧有帝王地邪寘妄言者于法既還臺同官以私  
忿欲劾大臣且誣以閨門之私以章示鈇鈇曰言事  
當顧大體奈何以曖昧之事汙鱗大臣其人慚而削  
之天順甲申陞浙江按察司副使奉璽書提督學校  
比至則明教條嚴考較進茂良 肅情竄跡是兩浙文

風丕振成化辛卯遷按察使尋丁憂服闋改雲南按察使雲南荒服之地外與哀牢交趾接因俗爲治寬其禁令馴以恩信蠻獠畏而懷之

伍驥

伍驥安福人景泰甲戌進士授監察御史出按于閩上杭巨寇謀作亂驥單騎從數十人直抵其穴降之斬其渠魁餘皆爲置牛具給種子令各就農衆大悅納命卒于京杭人肖像祀于城樓仍命建廟祀之子希閔成化乙未進士歷官福建兵備僉事再平上杭漳寇民德之配享父祠姪希淵天順甲申會魁進

本朝分省人物考卷之二十一  
上官至廣西布政祀于名宦祠希齊弘治庚戌進士  
卒于黃州府推官有治蹟一門累葉以春秋擅名于  
時

傅 韶

傅韶永豐人登進士授刑部郎中剛明有執嘗攝大  
司寇事時 太廟被盜金盆珠冠西臺繫至數百人  
韶承命往聽得其盜逮繫者得以全活遷黃州知府  
益勵清操力折豪強庶務爲之修舉

張敷華

張敷華字公實安福縣人父洪爲監察御史預土木

之難景泰初以死事蔭爲國子生少負氣節七歲時里社有竹木之祟乃指揮群兒斬伐殆盡識者知其不凡旣受蔭入太學益淬礪問學有經世之志於天順中甲申進士改庶吉士大學士李文達公賢彭文憲公時皆重之欲畱官翰林敷華與劉東山公大夏力辭不就成了化改元乙酉俱授兵部主事敷華在車駕郎中留心罔牧及講究九邊險易兵將強弱以自考鏡歷員外郎進郎中公廉執法不肯少有所跛倚事干時貴或欲軒輊之憫憫不輒撓又以抗法連忤中璫或令邏者捃摭亦竟無所得而罷時敷華隱然

負公輔望十一年擠出爲浙江叅議監溫處二府銀課景寧有礦盜聚至數千人鎮巡官議進兵敷華曰此可撫而定也乃刻日使自歸身往涖之賊露刃以待及諦視曰果我張公也皆駢首聽命遂執其首惡十二人餘悉宥之則又廣恩信以柔其不可爲異之心自是賢聲著兩浙終爲忌者尼之久羈不遷十年以秩滿進浙江右叅政益孜孜民隱清賦平徭養老恤孤每行部進諸生誨之修身進業之道士民躍然懷服未幾陞浙江右布政使屢斷疑獄又令里甲不足遞相繼補民用稍舒弘治元年轉湖廣左轄浙人

追思遮道不忍其去雖在浙久之不受人一介人亦  
不輕以一介溷之至楚歲大饑給粟散粥藥病埋死  
增價致買遣使告糴因修學宮以備直資饑者所活  
不可勝計四年進都察院右副都御史巡撫山西民  
不忍釋如浙人道聞母喪六年服闋仍舊任歲復歉  
奏暫增解池鹽課以補王府歲祿會霖雨躬禱於神  
池獨不壞歲給大同邊餉多用折納乃請太原以北  
可通車者運米民亦便之未幾改撫陝西禁婚娶論  
財喪葬不得舉樂有妖僧據山爲逆群議洶洶兵部  
尚書馬公文升曰張公實在必有處分比報至則已



受計令父老生縛之矣九年改南京兵部右侍郎十二年陞都察院右都御史總督漕運首黜武臣部運尤無良者權貴干請悉拒弗納近例漕司多假太倉官銀少免利息敷華謂逋負乃下剝上攘所致而官爲借貸大非政體峻爲之禁高郵諸湖隄久且壞乃爲深溝數道以緩湖水寶應地多平侈又趣令築隄隄成而水行至又奏准江西南兌糧二十五萬石折銀每石六錢又因久雨奏改京倉糧五十萬石於通倉收又因運河爭競奏准運船與王府官校船兩岸分十四年改南京都察院右都御史掌院事振揚風

紀鈴束各道無緣法爲市務崇大體慎廉隅又介特  
斬然不輕言笑與林公翰林公俊章公懋一時稱爲  
南都四君子十八年進南京刑部尚書尋以人望召  
改左都御史掌院事至則正身肅度表率百僚請嚴  
天下有司貪酷奔競之禁會讞重獄有寵臣坐法或  
疑當末減力執不可卒從重議正德改元有 旨令  
致仕卽日上道歸後逆瑾又矯詔指敷華與大學士  
劉公健等爲朋黨頒示天下逾年卒於家瑾誅贈太  
子少保謚簡肅遺命謂不以悖貨爲子孫累蓋至死  
不亂也

彭教

彭教字敷五吉水人自幼穎悟出羣未能言時父兄戲指齋堂題額語之明日試問焉卽能歷指以復四五歲教之書捉筆書點畫不爽口占韻語輒成章天順己卯舉江西鄉試第一越四年會試中第二又明年廷試擢第一授翰林院修撰承務郎預修英廟實錄編校精勤成化丁亥進儒林郎賜勅褒嘉并封父母妻是秋書成進侍講賜白金文綺戊子丁外艱辛卯起復壬辰同考會試尋丁內艱丙申起復丁酉考順天鄉試己亥始侍經筵於是已沾疾矣成化

庚子七月病卒敷五博學強記窮探力索必得乃已  
爲文章奇氣逸發光彩奪目而章鍛句鍊典則森嚴  
評論今古是是非非確然不可拔於事無微鉅動欲  
方駕古人居篤孝友執親喪哀毀骨立蔬食苦寢  
非杖不能起見者莫不動容父在殯鄰火倉皇遷避  
有頃二百餘家俱灰燼獨殯遷室得無恙人以爲孝  
誠所致山澤湍悍作舟以濟且規爲經久計其它所  
欲爲者尚多敷五莊重英毅崖岸嶄絕言動不苟抱  
負遠大初自書生不四五年間進位侍從銳意天下  
事若無難者俯視功業可拾取也旣連遭喪優游無

所事乃杜門刻勵自持無一躁戚語然竟不及一施  
以至於沒

劉震

劉震字道亨安福人六歲其父遣從叔父德育受業  
出就數里外蹣蹣然挾書以往不以遠辭凡其父遺  
書訓教藏置惟謹長入縣學爲弟子天順壬午登鄉  
舉及會試屢不偶人爲淹滯惜則愈自奮發志不少  
衰竟擢甲科高等初授翰林編修秩滿進侍講會國  
子缺司吏部求其人不得擢震右諭德管司業事秩  
將滿始再擢南京祭酒爲人氣剛而色毅言直而情

真與人處不詭隨遇事不合於理拂然不從人有善  
輒稱之不善必斥之不容見朝士好進取者尤薄其  
爲人故居官始終自守竟老于監官而無援之者其  
爲教以身率先諸生不少縱逸日課季試必嚴至於  
歲遣歷事諸司人無敢紊其序者其居師席望其容  
貌若不可親然篤於恩義見寒窶者多周濟之南監  
廬舍歲久甚敝節縮公用修治殆徧諸生係其學政  
相與作詩紀之初擢監官適上視學與祭酒賜坐  
堂上次當講易詞義明暢上爲聳聽翌日被賜襲  
衣仍勅宴於禮部人以爲榮遇平生文思敏贍下

筆數百言不蹈襲陳語所著文稿藏于家

### 周孟中

周孟中字時可廬陵人自少志趣不羣十六補郡學弟子員成化乙酉預計偕明年春試弗利江西提學僉事李君興教白鹿書院聘中爲之師取程端蒙董銖所爲學則并朱子洞學舊規嚴率諸生皆翕然知所向方負笈至者甚衆尋與南康守不合遂罷歸已廿中進士第授南京吏部文選主事戊戌轉僉事提學福建至則端士習培士氣一以教於白鹿者施之品藻進退付之至公不爲權勢所撓於宋諸儒祠墓

徧加修葺甲辰改貴州僉事會夷寇出沒鎮巡議加  
殲滅中推誠撫諭率多懷服歸欵丁未陞副使提學  
廣西嶺表逢掖稀少作興有道士始知學所歷郡縣  
凡吏治之臧否間閭之利病夷情之向背山川之險  
易兵糧之虛實靡不究知弘治乙卯轉按察使戊午  
轉浙江右布政使未幾轉廣東左先是海舶中官歲  
例採珠造櫃并僉大戶解納侵剋不貲至是商賈之  
利復籠取殆盡悉加裁革地方安靖民間婚嫁後期  
喪葬不舉皆有禁俗爲之變中學本於主敬窮理以  
朱子晚年謂敬字之義惟畏字近之故號畏齋以天



性過剛恐福急害道取西門豹佩韋之意別號韋菴  
性至孝太安人晚病風痺寢興湯藥躬視弗懈俸祿  
所入舉以建先祠置祭田周宗戚平生砥礪名節爲  
詩文有關涉發明要不徒作有畏齋橐藏于家致仕  
抵家越四月而疾作年六十六卒

羅璟

羅璟字明仲泰和縣人將誕之夕父夢霍栖堂中璟  
生而天庭有痣如丹砂人咸異之天順八年進士及  
第第三人授翰林院編修預修實錄成陞修撰成化  
初陳厲聖志樂聖學接群臣辨賢否容諫諍崇節儉

六事以修績資治通鑑綱目成陞司經局洗馬侍  
東宮講讀璟與吏部尚書尹旻子侍講龍同娶于孔  
氏學士彭華尹直嘗欲因璟私交於旻璟正色拒之  
華直由是怨璟二十二年璟以服闋至京其鄉人侍  
講王臣方謀侍 東宮侍講恐璟補之乃與華直共  
嗾李孜省指璟爲龍黨內批調璟南京禮部員外郎  
遂詰責尚書耿裕當璟以憂去何不補缺時孜省黨  
工部尚書李裕欲奪其位故并責之未幾耿裕亦調  
南京禮部而李裕果轉吏部士論爲之不平弘治初  
陞璟爲福建提學副使尋陞南京國子監祭酒居五

年致仕卒璟坦夷率直議論持正與人交不設城府  
爲文章詞旨暢達雖爲人中傷調官實非其罪獨爲  
提學祭酒時傷寬緩然亦無大過云

張達

張達字時達泰和人天順八年進士授工部主事遷  
郎中擢應天府丞丁憂起復改南京鴻臚寺卿轉南  
光祿卿弘治十三年擢工部右侍郎卒賜祭塋如例  
達純朴不事表飾待人周密有禮平生罔有失色者  
居官勤慎守法鮮玷缺可議晚年言官有論其禮儀  
粗率者達方對客聞之笑曰我固粗率人言者之論

諒哉其性度渾厚類如此

康驥

康驥泰和人拜監察御史天順初宦官武將竊威弄權致賣官鬻爵以干憲度驥抗章論其奸狀群小交相泣訴于上下驥獄拷掠備極而詞氣侃侃不少挫旣得恩釋奸黨縮首以避後巡按山東北直所至風紀肅然吏民畏憚後陞福建轉運使卒于家

楊琚

楊琚泰和人兵部主事出鎮山海關政令多著爲例轉武選郎中紀功陝西嘗奏改延綏城堡及建言軍

民利病 上多采納尋陞叅議奉 命撫治荆襄築  
老龍隄疏竹筒河及荆改劉家隔雷峰坳等水驛巡  
司皆有利于民而開荆鄖陽功尤居多以叅政總督  
糧儲致仕卒

阮玘

阮玘天順進士授行人所至不辱 君命拜監察御  
史貪暴不敢肆侵漁董築運河決隄令有司與民爲  
期約民悅事集尋以巡視鹽場冒暑得疾至京卒歛  
殯不能自舉鄉舊共賻僅得歸視玘平生篤行動以  
古人自期其孝友尤爲人所重云

宋儀望

宋儀望字望之永豐人由進士爲吳縣令念諸區所苦者長賦長賦所苦者長運往往破家望倡諸區各出公田以贍之所出田畝計本受田爲差次卽貴勢無得免者民以不困虜大入寇餉不給大司農計專官併責吳舊賦人洵洵且竄望白郡榜慰而條處其緩急竄者復矣乃與比邑合而置義塚於六門之郭禁毋得水火葬吳俗幾變爲御史時上書論大將軍仇鸞擁勁兵居肘腋挾虜自重無人臣禮未幾鸞死事露戮屍及妻子望意發舒陳時務十二策出按河

東離移疾歸病痊復爲御史司大計時望之鄉人幸  
相有暱子橫而貪望欲紂之不果因論邊事遂及東  
南而以督臣胡之淫侈撫臣阮之婪荒請攝治之二  
臣暱子之心膺也以是不悅望會望督視三殿大朝  
門又中貴人議工直日一鍰望不可又欲悉易殿趾  
石望又不可第易其燬弗堪者而暱子私賈人五千  
金屬工部歐陽尚書者辟與工事望又不可於是衆  
怨叢矣其遷大理丞暱子自以爲功望無所報謝而  
以請急歸適風霾變宰相欲有所廢樹及大計吏而  
尚書遷吏部與暱子比謀謫望兵備霸州移閩監軍

與大帥戚合策破倭入與棘事所撰程式義冠一時  
藉藉稱望有文武才而計吏之謫復下望方從容賦  
詩歸屬邊事棘以薦補四川按察僉事復爲副使視  
福建學政自是參其省政佐太僕大理皆不久遷其  
撫南直隸九郡則自相國張知之望故令吳務爲寬  
大而於雲間金壇溧陽豪貴人之匿賦而以重累單  
赤者無所縱貸時海警稍懈諱言兵獨與兵使者益  
修餘艘練卒伍飭戎器申嚴賞罰無幾倭至遣舟師  
三覆之於外洋會有詔雪靖難死事諸臣望謂金陵  
其死事所也建表忠祠聚而祀之鄉人宋楊邦又以



不屈女直死江寧墓且湮行求得之爲置封樹因故  
祠陞宮而歲饗焉坐與御史論相異同遂決意不復  
出卒年六十五生而有大人志讀宋史秦檜陷岳武  
穆而歎父怪之對曰令兒生其時不飲血而碎檜首  
者有如日又讀唐史裴度傳賊滅則朝天有期賊在  
則歸闕無日大嗟泣曰壯哉男子當如此耳從聶貞  
襄豹遊得聞王陽明良知之旨時方議以陽明從祀  
孔廟而拘儒或難之望曰是未易以口舌爭著或問  
謂堯舜開道心精一之傳未嘗求理於物格心於外  
孔門大學首言明明德明德卽道心之靈覺不昧者

然則明明德之功要在致知而訓詁之士乃謂致知者推極其知識是求之物而皓之外也陽明指而示人曰致吾心之良知而已是知也孟子之所謂孩提之知愛知敬顏子之有不善未嘗不知也然得大學之本旨而上遡堯舜精一之傳者無如陽明或問出見者爽然後十餘年陽明卒從祀所著有陽山稿華陽館集

蕭 禎

蕭禎字彥祥泰和人幼失怙生有高資能自奮於學期必取科第遊學於外族人有隸尺籍蜀中者往依

之學成弟子多從受業然益困無所遇脩然西歸舟行峽江隅墮深淵中自分必死矣忽若有物扶其足而起適得漂櫓負而登岸人異其事謂後當顯達竟以儒士舉於鄉天順甲申登進士第成化乙酉授南京刑部貴州司主事己丑陞湖廣司員外郎治獄明決爭訟者一訊輒得其情據律剖斷庭無畱獄人皆稱之壬辰擢湖廣按察司僉事分巡一道明決如在刑部時所至郡縣興舉廢墜尤好獎進人才敦勸民俗不專以簿書爲事俄苗寇竊發詔出兵剿之文武大臣或不相能禎適以事在軍中曰自古未有大臣

不和而能成事者况用兵又事之大者乎爲反覆開  
解大臣感悟寇卒平禎當紀功則有以婦女首級徼  
功者辨其僞斥之及奏捷加四品俸吉王建國長沙  
禎復督工役一時夫匠被人擾害者賴以安巡按御  
史累奏其治績辛丑擢本司副使丙午再擢按察使  
於是蒞湖廣者歲久治績愈著名益起明年遂遷河  
南左布政使至則宣上德究民隱尤不肯以公錢曲  
奉權貴人人以爲難弘治戊申會陞巡撫陝西右副  
都御史得便宜行事陝西當凶荒之餘民初復業禎  
加意安輯流移者至乃內務蓄積外爲備禦兵民晏

然西方無事歲當慮囚得可矜疑者悉置輕典奏  
上囚多免枉死作全命錄以著朝廷欽恤之意而是  
時一裨帥犯法素有聲勢爲請托者多卒論如律復  
以平寇功有文綺寶鈔之賜辛亥遷南京工部右侍  
郎甲寅改刑部丁巳始有工部尚書之命南京爲舊  
都凡壇廟宮闕城垣橋道歲久漸圯修治無虛歲禎  
計夫匠量材物役用必當未嘗妄費權貴人有乘時  
求利者往往無所得每土功告成輒蒙恩賜蒞事三  
年以老疾去而卒禎少時羅夫人憐其幼弱析與田  
產特厚後夫人卒禎悉讓還二兄取舊券焚之親黨

若故刑部尚書劉廣衡而下率譽以爲不可及壯且貴痛念父母不及祿養過塋域輒慟哭如初喪居家作敦本堂及置祭田供合祀祖先之費至于處宗族待故舊無不歸於厚者若其歷官四十年田廬僅足服食不侈於物無所玩好稍暇惟讀書賦詩而已

羅倫

羅倫字彞正永豐人性慷慨樂善補郡庠弟子員勵志聖賢之學嘗曰舉業非能壞人人自壞之耳郡守張公瑄嘉其學行而惜其貧命有司周之謝弗受景泰丙子領鄉薦癸未赴春闈遭火患呼曰吾平生無

毫髮得罪于天今乃至此柰吾親何須臾火滅僅獲  
免成化丙戌舉進士第一對策頃刻萬言指切時弊  
拳拳以格君務學爲說中引程正叔語人主一日之  
間接賢士大夫之時多親宦官宮妾之時少執政欲  
節其下句毅然不從直聲震于時授翰林院修撰會  
東閣大學士李文達公遭喪朝廷畱之倫告以不可  
李公始以其言爲然旣數日復上疏歷陳古今起復  
之非是且曰如其不然必准富弼故事終喪及劉珙  
故事反覆數千言一本于天理人心之不可已者疏  
奏落職提舉泉州市舶司士論榮之終倫之世大臣

未嘗有起復者明年召還修撰改南京尋以疾辭歸  
開館受徒日以註經爲業邑有山名金牛在萬山中  
非人所居倫與從學者築室讀書其中至未數日中  
嵐氣而卒倫嘗欲倣古置義田以贍族人或助之堂  
食錢謝而弗受或衣之衣行遇乞人死于途輒解之  
以覆客晨至畱客飯妻語其子曰瓶粟罄矣貸之傍  
舍比舉火日已近午亦曠然不以爲意李文達卒商  
文毅公復入閣言於上始復官適廬陵陳公文亦卒  
士有爲詩悼之者末二句云九原若見南陽李爲道  
羅生已復官時論之負不平也如此



劉 彬

劉彬字素彬永豐人與羅倫同師及同授春秋於鄧表年所或經年乃一歸以德業相勵鄉俗目爲迂儒嗤之曰羅古人劉古人且有欲破其交者倫詩有浪拍洞庭君山不動之語彬笑曰君山豈足喻吾交君山靜而不動吾交動靜不違倫告之曰科名文詞皆淨洗而痛決之不使亂吾之念慮一意從事聖賢之學必至於成人而後已榮華與道謬永貽身後嗤胡可以有盡之身而貽無窮之辱乎仕止久速各當其可此孔子所以聖也彬曰一峯平生故人今墓木拱

矣生年不滿五十其出處語默進退如是吾敢負一  
峯乎白沙先生曰別駕自審去就何與一峯也彬貌  
癯骨秀心純正五歲而孤母張撫育之時從巫用甕  
甕關於祠案下謂十五出關時破甕名曰破關祈可  
生彬默用石碎之母怒跪曰壽夭在天非巫可求天  
感母德吾自可生母宜安心勿惑異端舉進士授潮  
州程鄉知縣痛俗薄惡撤賭場禁酒肆逐娼優出境  
民不復破產部民王慎德彬直其誣軍數年之枉以  
黃金十五兩包香茶中跪送彬揮之去曰生汝者吾  
父母之心豈愛報乎考績赴部老穉追攀道左彬曰

若等母慮吾行不出半年耳去任未三月鄰邑饒平賊發城陷奔屯程鄉深谷中官民大懼時彬過家臥病聞之明日卽力疾陸趨四日及境四野歡喧卽白行軍布政陶魯軍衆邑小乞散之鄰邑以紓民困陶擒賊五百餘真偽相半彬力爭民命不可輕陶不聽且曰君不亦當立功乎彬厲色曰吾爲民父母坐視子弟命絕何謂立功卽白巡按御史雪其無辜者過半九年考績方伯劉大夏署云無能事之虛名有牧民之實惠彬旣去百姓塑像立祠陞雷州府同知設施畧如程鄉士民亦樂趨教以疾解官民謠曰知府

似爛泥通判似豆腐去了劉同知倒了雷州府武  
廟嗣位詔進朝請大夫以疾終於家年七十七

彭禮

彭禮字彥恭安福縣人內閣彭文思弟也成化壬辰  
進士十年授兵部職方司主事十八年陞本司員外  
郎二十年陞本司郎中二十三年陞太僕寺少卿弘  
治三年禮奏言近奉勅凡州縣倒失寄養馬匹立  
限責償遇赦不宥禮以爲欲惇不赦之信莫若寬假  
自今四月以後責償如例弘治元年正月至今每馬  
一匹令償銀三兩則人樂輸官易於徵求又人情納

銀易納馬難若每孳生一匹令納銀七兩解貯本寺  
聽候買馬給軍則催徵之中常寓寬恤之意馬不致  
大耗矣四年禮又言自古牧馬多在監苑未聞寄養  
民間今寄馬駒歲課無窮而民間戶丁生長有限以  
有限之丁責無窮之駒民困無由而蘇請今定種馬  
之額爲十萬匹歲取駒二萬五千永爲定額不增駒  
存其高壯者以備歲用不堪者變價貯之太僕寺以  
俟他用如有倒失卽令補足遇赦不免可爲久遠之  
計兵部尙書馬文升覆奏行之於是兩京種馬始有  
定額五年陞太僕寺卿八年命管易州山厰本年陞

工部右侍郎仍舊管山殿十一年四月改都察院左副都御史總督蘇松糧儲巡撫應天等府地方十五年同知府劉琬改定加耗例未幾致仕卒於家

羅璞

羅璞字宗溫號石齋吉水人汝敬子成化甲午領鄉書弘治己酉就銓試授紹興府同知同知以清戎爲首務初至歷稽前政率無可攷乃出己意創造歸衛歸姓二冊一覽卽洞見本末弊無所容當道善之下其法于列郡山陰民有婦弗檢事覺自盡其父誣壻殺之獄成令手璞當覆訊具得其情謂其令曰此律

有明文自當勿論可濫及無辜邪其誣遂白蕭山塘  
圯承檄董千夫徃築計丈分授之令簡慮周功以時  
成而高壯可久海濱之民大蒙其利擢思南知府府  
治依山無城郭盜賊虎狼積爲民患首設方畧築土  
城以爲固甃其四門置兵守之前患頓息撫民以寬  
御土官一以法土官有張羽者以餽茶爲名中藏金  
銀器數事輒斥去威令大行踰年苗賊米魯等作亂  
朝命大臣總川湖雲貴兵討之璞被選督餉一夕查  
城驛偵知賊中陰謀亟伏兵要地爲備夜二鼓賊果  
至伏兵起而擊之獲其酋黃實熊大輔喜動軍門進

至關索嶺馬驚逸墜崖下息僅屬信宿小愈卽強起  
治事比賊平芻粟未嘗乏供以平賊功陞貴州左叅  
政致仕歸正德己巳盜起于鄉與曾憲副協謀創立  
保伍以折其勢辛未流賊逼境復尋初約聲勢張合  
羣兇竟莫敢犯一鄉賴之嘉靖壬辰壽九十適遇國  
慶覃恩誥封中憲大夫

伍 符

伍符字朝信安福人父希淵會試舉春秋第一累官  
右布政祀于廣之宦祠符年十九母劉氏卒于廣州  
匍匐歸其喪成化癸卯鄉試亦舉春秋第一丁未登



進士選入翰林學士汪傳並稱奇才會有忌者竟授  
刑部主事大司寇屠寔器之命典司章奏法比精詳  
轉員外郎會嘉興寧波並缺守司寇欲爲嘉興得之  
乃冢宰屠曰我方秉銓而不能得一賢守乎竟以補  
寧波到郡卽以古循吏自效自公庭以至屬邑莫不  
整整時有監生袁孟恪貲豪顯壻殺人無忌有楊大  
王怙勢橫暴吞噬細弱官司不敢問符捕殺之篤意  
黌校課講習資膏薪所獎拔如聞淵輩爲時名卿他  
如均徭役治水利減筵宴戒戲劇禱雨禳疫察冒賑  
訊黥盜章卓甚矣會當考察科道疏舉天下守一十

七人符爲首嘗歲侵民不聊生令民得下海網捕爲  
活海道以令不自己怒之嗾御史劾逮郡士民七千  
餘人連名赴闕疏太守爲民得罪之故 孝皇寤而  
釋之反坐言者乙丑九載考績擢浙江左叅政風動  
列郡已巳轉雲南右布政到任甫三月逆瑾以宿憾  
傾之繫獄瑾敗乃免歸辛未起湖廣右布政會父喪  
服除未起銓部輒補四川右布政蜀值兵後百計撫  
綏會松藩寇警督餉著勞捷聞賜金幣乙亥陞福建  
左布政使丙子入覲銓部考天下方面官獨與張時  
峻最焉戊寅陞南京光祿寺卿代事者已半月豪軍

假以缺糧倡亂會鎮守市舶西內臣以不見禮害符  
適錢寧竊柄逮捕詔獄旣而得白已乃補直隸巡撫  
甫持節 武皇甫南巡細鉅畢辦 上嘉悅舉銀觴  
觴之武將劉暉宦官張忠並以寵倖前驅竊弄威福  
正色與抗卒莫之逞畿輔要衝王師絡繹民心凜凜  
多方鎮定六郡三關宴然安堵 駕旋僅拜銀牌之  
賜不阿左右故也連疏乞休 溫旨慰留 世宗御  
極懇乞骸骨五疏始得允年六十三卒

劉 丙

劉丙字文煥安福縣人成化丁未進士改翰林庶吉

士授監察御史遷福建按察司提學副使以憂去服闋調四川左布政使進右副都御史巡撫湖廣擢工部右侍郎兼右僉都御史督採大木丙操履清介喜於有爲政尚嚴勵無所貸縱雖頗取怨而法令修舉士民畏之及膺採木之任親入山谷冒嵐瘴遂致疾卒訃聞贈工部尚書謚恭襄賜祭葬如例

### 王禎

王禎吉水人夔州府通判荆襄劇賊石和尚反禎領民壯與戰大敗之越三月賊大集禎曰今日當以死報國復領兵壯衝賊鋒殊死戰援兵不至遂爲賊所

獲頑奮罵不已賊殺之 詔贈夔州府同知錄其子  
廣平太學

馬 鉉

馬鉉永新人成化進士授工部主事律身廉約治事  
周密時役夫多病疫癘鉉親爲察脉而藥之盡獲甦  
愈民祠祀之再陞廣西叅議會古田苗賊猖獗自將  
往勦出其不意斬獲過半班師歸爲伏兵夾戰竟死  
之事 聞諭祭贈叅政錄其子

劉 戡

劉戡安福人成化進士及第授翰林院編修進侍講

孝宗皇帝嗣位充正使使交趾交趾時吞占城侵緬甸頗崛驚僉難其行戩承命乘肩輿從兩僮道南寧直抵其境交人驚曰豈天人耶館候視昔倍恭餽遺一無所顧交人謝表有廷臣清白之語又爲建却金亭於思明道中後以春坊右諭德終所著有晉軒集

周魯

周魯吉水人成化進士授監察御史出按雲南彈劾不避抽分盧溝權貴杜絕時有以司馬遷冢宰者十三道以爲不可欲言之而無肯當先者魯曰言官畏言耶卽首署其名冢宰憾之後與都憲公論差法不

合因巡山西以疾乞休杜門自守終于家

彭杰

彭杰字景俊吉水人與從弟叅政桓少同學穎敏強記人奇之號爲二彭弘治己酉舉鄉試庚戌賜進士出身第四人學有師承多讀書爲文章汪洋恣肆而準于義理嘗負大志以爲天下事無不可爲者故入仕三十四年所在必稱其官多於難能者談笑舉之而氣不能下人亦竟以此屈抑不能大顯初釋褐爲刑部取案牘繙閱數日笑曰刑名止若是乎於是操劄卽踰老吏以爲治獄當得人情而不可拘於律令

當先權要而不可過求於寡弱凡所奏讞雖隆貴子弟無所回避人竟莫有難者及爲知府文案山積手自批答吏胥拱手無敢舞文而所屬州縣皆得別其賢否使得以已意爲治大率主於愛民而不取具文法四川十八寨僂夷叛杰以叅政督餉出險道師賴以捷歸至叙州宣慰使冉儀所部妄有所掠按察僉事郭公某廉其首咎之儀部下鼓譟且叛城門晝閉杰時適至行其營呼儀曰若與吾非征僂夷來乎柰何復以身家效僂夷儀感悟復爲畫計謝郭得全軍歸初僂夷爲人挾誘頗悔禍杰欲撫定之而議者貪



功遂致用兵士卒死者十六七乃得小捷當道始多  
之事聞朝廷特賜白金文綺故事上官父老子代者  
必納賄諸司始得請緣是上官狎諸司征調輒爲無  
狀播州宣慰使楊斌病請代而賂不至數年爲諸司  
所格杰至卽奏代以金謝不受涕泣持去其爲雲南  
司鹽法在湖廣宗室甚繁歲入祿米多羨餘二者人  
咸籍以自利杰一無所染而下州所產丹砂蛇艾諸  
物當道有物色者皆不應劉瑾用事威虐中外畿內  
郡邑皆歲有所獻杰爲廣平止具三帕瑾笑曰是非  
清苦太守耶飯其使遣之雲南黔國公沐紹勛禮絕

方岳杰與分廷相抗武定侯郭勛鎮湖廣肆武斷二  
司不敢馳中道行杰強其門以入二人者竟亦無所  
報少嘗慕范文正義田恨不能給每割產分俸以思  
效家居貧薄絕跡公府處隣里親友不異儒生性喜  
飲飲必擇酒酒必引滿醉則掀髯高論若無與伍冬  
月能飲水數升經年不浴身無垢穢往在南京仙人  
尹蓬頭常來乞食每假宿戲語他貴人邀之卽不去  
杰享年至八十有五強壯不衰人遂以爲得仙一日  
偶病酒檢遊仙詩日自默誦已而索修真書忽不能  
視遂瞑目寢家人驚問曰有分付否微應曰分付何

用又問曰心明白否瞠目應曰比汝更明遂逝

### 何孟春

何孟春字子元先世廬陵人遷于廣元有爲都統鎮柳桂者因家郴祖俊雲南按察僉事父說刑部郎中孟春少穎異稱奇童長游李文正之門文正器之弘治癸丑進士兵部主事員外郎中馬端肅劉忠簡大見器重嘗使山陝清馬政還上五事併劾撫臣不職朝論韙之爲河南叅政擢太僕少卿究極馬政利害兵部著爲例武宗朝嘗欲取馬價他用孟春力言不可竟止晉正卿拜都察院右副都御史巡撫雲南

多所興革討十八寨叛逆立永昌府增五長官司五  
守禦所歲增賦若干石召爲南京兵部右侍郎尋改  
吏部以引拔人材爲已任與喬太宰宇林司寇俊彭  
司馬澤汪少宰俊同心謀議焉嘉靖甲申議大禮孟  
春前後三上疏勸從初議復諧百官伏闕以請調  
南京工部旋引疾歸及明倫大典成詔削籍年六  
十三而卒謚文簡孟春博究經史歷數兵法皆所精  
研著作甚富有何文簡公文集行于世

### 趙璜

趙璜字庭實號西峯安福縣人五歲失恃卽英發有

巨人志時父恒齋官蜀之黔江過石首舟觸漲濤璜  
墜水流半里許不溺見者驚異十歲父補富順教諭  
就傳死馬龔公維嶽舉業日有造詣嘗讀書僧寺有  
賈耽佛殿遺一囊盡琥珀珠物璜拾之踰時賈索囊  
驗實還之賈探囊以謝麾之而去芻治詩經歸安福  
專治春秋作解願若干卷學者心服執經門下者日  
益以衆成化丙午以儒士中鄉闈亞魁錄經義爲程  
式弘治庚戌登進士援例歸省癸丑授都水司主事  
督呂梁洪置夫數千半爲土豪隱占甚至侵偏署傍  
隙地璜召至諭以法豪憚威革心無敢後者往來中

饋餽送悉卻之供應廩米之外蔬果不入丙辰秩滿  
改兵部武選勵清操精選法吏胥斂服罔敢售其奸  
戊午遷職方司員外郎大司馬鈞陽馬公極器重之  
遇重務每咨籌稱善草疏多出瑱手薦堪大用己未  
典會試文衡秉公竭明以得士稱庚午陞山東濟南  
府知府府有積年舞文爲政蠹守莫能制瑱預選吏  
農性敏者教之法律親爲改訂擬踰月得可役者二  
十餘人遂盡逐之宿弊犁然以革處同僚以和每救  
正弗逮或有變故者從厚周之作興學校誨以作文  
讀書之法士子成才科第倍昔辛酉甲子兩與簾外

程文多出璜筆每遇旱災憂形於色積誠祈禱輒應  
乙丑郡告蝗蝻璜曰此吾咎也修省額神限期蝗絕  
凡七年濟南無歉歲海豐有殺人而逸者誣逮者籍  
戍久之潛歸有司獲以解府璜察非其罪密使人緝  
得渠惡伏辜戍者獲釋撫按藩臬凡有大政疑獄悉  
以什璜如漢庶人牧馬草場舊係屯田給佃於民息  
入官王府屢行奏乞百姓苦之數經勘處依違弗決  
璜竟歸於民感念至飲食必祝鎮守中貴舊蒞臨清  
欲移鎮省城以張威納賂璜白撫按以計寢之而民  
獲安堵尋有二巨璫以選婚至郡皆憚璜弗敢肆虐

徃犴無畱獄府庫積銀至二十萬有奇廩粟三倍之  
冊載詳明無毫釐爽後雖逆瑾查盤羅織竟不能中  
傷丁卯春陞順天府丞瑾責賂於璜弗得逮繫詔獄  
民號呼攀挽車不能前竟奪職歸田里環堵蕭然瑾  
誅臺諫論薦召復舊銜署京兆印治多中貴及勢要  
田土有司不勝其凌逼乃懲其一二自是驕恣者屏  
跡辛未陞右僉都御史奉勅巡撫宣府有權貴擅  
監利攬納軍儲事發奏逮數百人璜親鞫之置諸法  
逮者盡釋之壬申山東寇起廷議推調巡撫奉勅  
以行父老歡迎感動璜擇藩臬中賢能者分賑之脇



從聽撫橫死者掩遺骸表節義以敦風化凡徭役徵  
輸悉曲計處之民困大甦黃河退灘地數百里最爲  
沃壤璜令有司集流氓使墾爲田許復其業番僧怙  
寵奏乞起科充齋糧旗校肆威恐嚇有司莫能制璜  
以去就爭之得免乙亥黃陵岡河變運道幾危擢工  
部右侍郎兼憲職奉勅總理受命之三日卽趨  
河上躬率官民三月胼胝水勢稍退貽文河伯與共  
責任數日狂流壅沙護岸三埽告成人以爲神逾年  
白洋河口警報沓至奉命經略罷斥曠瘼舉謀勇  
將領計捕權貴陰庇宿寇以戢內梗軍容於是整肅

設法賑濟活饑莩甚衆還朝佐理部事奉勅督運  
大木營建乾清坤寧兩宮設法舟運省費不貲辛巳  
兩宮成辭錦衣世襲之蔭受飛魚麒麟金帛之賜  
世廟踐祚迎扈至河南還賜羊酒膳饌嘉勞加俸一  
級具辭不允是年轉本部左侍郎署部事奏毀鎮國  
府玄明宮并香房酒店保安洪福諸寺院洎諸權奸  
廬舍以備國用以紓民力修濬城池街道溝渠以至  
宗人府詹事府國子監城隍廟凡圯壞衙宇一新葺  
之京師改觀嘉靖壬午陞本部尚書侍經筵工曹錢  
糧百需所在出入頻繁謾無稽考璜令司廳四司各

立文簿互相稽察宿弊釐革殆盡凡朝廷有大興作皆自計畫裁損居多乙酉冬二品三載績奏上

遣中官賜羊酒累沐恩賜文獻通考敬一箴資治

通鑑御製洪範序獻皇帝睿筆皆一時殊遇也

世廟工成再領金幣之賜議處營建仁壽錢糧幾

百萬皆取之府庫不徵派于民天下陰受澤率類此

然秉公持正多忤貴人意由是去志益堅丁亥懇辭

休荷優詔褒榮仍給驛還鄉歲隸六名月米五

全名完節士林高之明年遇例進榮祿大夫璜每

激國恩惟焚香遙祝冀聖壽無疆前星早

耀而已家居凡五年臺諫累章薦起壬辰夏四月工  
部缺尚書特旨下吏部起復任使及門璜捧檄流  
涕具疏以疾辭不允竟未及赴而卒訃聞命官諭  
祭營宅兆贈太子太保諡莊靖年七十